

Resolución do 25 de abril de 2023 da Dirección Xeral de Formación Profesional pola que se convoca o 7º Campionato Galego de Formación Profesional, *GaliciaSkills 2023*.

As características do mercado laboral e do escenario económico actual precisan do impulso dunha Formación Profesional en permanente evolución, con capacidade de adaptación aos cambios do contorno produtivo e ao novo modelo económico baseado no coñecemento como forza impulsora.

O Decreto 114/2010, do 1 de xullo, polo que se establece a ordenación xeral da Formación Profesional do sistema educativo de Galicia establece no seu artigo 2º que a Formación Profesional comprende un conxunto de accións formativas que capacitan para o desempeño cualificado das profesións, o acceso ao emprego e a participación activa na vida social, cultural e económica.

Unha das accións para a mellora da calidade da Formación Profesional e a difusión destas ensinanzas é o desenvolvemento de competicións de alumnado de Formación Profesional no que este pode demostrar as habilidades e destrezas adquiridas nos ciclos formativos que está a cursar.

Dentro do ámbito das súas competencias a Consellería de Cultura, Educación, Formación Profesional e Universidades ven organizando o campionato galego de Formación Profesional *GaliciaSkills*. Esta competición constitúe un valioso instrumento para fomentar a Formación Profesional así como para incrementar a implicación de estudantes, profesores e empresas de distintos sectores.

Este campionato celébrase cada dous anos e o alumnado gañador de cada unha das competicións conforma o equipo que representa a Galicia no campionato nacional de Formación Profesional, *SpainSkills*. O alumnado gañador de *SpainSkills* é, a súa vez, o encargado de representar a España nos campionatos internacionais *EuroSkills* e *WorldSkills*.

Esta actuación enmárcanse dentro do Programa de Cooperación Territorial de Calidade en Formación Profesional do Sistema Educativo Español, do *Ministerio de Educación y Formación Profesional*, a través do reparto de crédito do *Acuerdo de la Comisión General de Educación, de 21 de julio de 2022*. Dito programa contempla como actuacións subvencionables as accións de difusión referidas á organización e participación en campionatos autonómicos de Formación Profesional e é susceptible de cofinanciación polo Fondo Social Europeo Plus (FSE+), no Marco Financeiro Plurianual 2021-2027.

Por todo iso, de conformidade coas atribucións recollidas no artigo 25 do Decreto 119/2022, de 23 de xuño, polo que se establece a estrutura orgánica da Consellería de Cultura, Educación, Formación Profesional e Universidades, esta Dirección Xeral,

RESOLVE:

Artigo 1. Obxecto

O obxecto desta resolución é convocar o 7º Campionato Galego da Formación Profesional, *GaliciaSkills 2023*.

Os principais obxectivos desta competición son:

- Promocionar e difundir as ensinanzas de Formación Profesional na comunidade autónoma.
- Fomentar valores de carácter persoal e social asociados ás boas prácticas do alumnado



de Formación Profesional.

- Estimular e motivar ao alumnado de Formación Profesional, incidindo no seu rendemento académico e futuro profesional.
- Recoñecer a profesionalidade e dedicación do profesorado de Formación Profesional.
- Potenciar a relación entre os centros docentes e as empresas, fomentando a transferencia de coñecemento e estreitando lazos entre a realidade empresarial e laboral e a Formación Profesional no ámbito educativo.
- Seleccionar ao equipo galego que nos represente no Campionato Nacional de Formación Profesional, *SpainSkills 2024*.

Artigo 2. Modalidades de competición

Nesta edición convócanse as seguintes 27 modalidades de competición:

ÁREAS DE ACTIVIDADE	MODALIDADES DE COMPETICIÓN	PARTICIPACIÓN
TRANSPORTE E LOXÍSTICA	Reparación de carrocería	Individual
	Tecnoloxía do automóbil	Individual
	Pintura do automóbil	Individual
CONSTRUCCIÓN E INSTALACIÓN	Fontanería e calefacción	Individual
	Instalacións eléctricas	Individual
	Ebanistería	Individual
	Carpintería	Individual
	Xardinaría paisaxística	Parellas
FABRICACIÓN	Refrixeración e aire acondicionado	Individual
	Mecatrónica	Parellas
	Deseño mecánico-CAD	Individual
	CNC Fresado	Individual
	Soldadura	Individual
	Electrónica	Individual
INFORMÁTICA E COMUNICACIÓN	Control industrial	Individual
	Desenvolvemento web	Individual
ARTES CREATIVAS	Administración de sistemas en rede	Individual
	Floraría	Individual
	Tecnoloxía da moda	Individual
SERVIZOS	Deseño de xogos e animacións 3D	Individual
	Peiteado	Individual
	Estética	Individual
	Panadaría	Individual
	Cociña	Individual
	Servizo de restaurante e bar	Individual
	Coidados auxiliares de enfermaría/Atención sociosanitaria	Individual
Recepción hoteleira	Individual	



As descrições das probas de cada modalidade de competición publicaranse en <http://www.edu.xunta.gal/fp/galiciaskills-2023>.

Ademais das referidas modalidades de competición, en *GaliciaSkills 2023* desenvolveranse simultaneamente:

- Oito competicións en formato exhibición, nas que alumnado e profesorado dos ciclos formativos asociados amosarán últimas tendencias e tecnoloxías nas seguintes especialidades.

MODALIDADES DE EXHIBICIÓN	PARTICIPACIÓN
Industria 4.0	Parellas
Sistemas robóticos integrados	Parellas
Robótica colaborativa	Parellas
Fabricación aditiva	Individual
Ciberseguridade	Parellas
Tecnoloxía de laboratorio químico	Individual
Atención dermofarmacéutica	Individual
Escaparatismo e comercialización visual	Individual

- Catro competicións destinadas aos Centros de Educación Especial (CEE), nas que poderán participar alumnado e profesorado dos Programas formativos básicos.

MODALIDADES CEE	PARTICIPACIÓN
Servizos de restauración	Parellas
Xardinaría e viveirismo	Parellas
Peiteado	Parellas
Reprografía	Parellas

Artigo 3. Lugar e data de celebración

GaliciaSkills 2023 celebrarase en Silleda no recinto Feira Internacional de Galicia Abanca os días 25, 26 e 27 de outubro. Os días 25 e 26 de outubro terán lugar as competicións e o día 27 será a cerimonia de clausura e a entrega de medallas.

Artigo 4. Destinatarios

Os centros educativos da nosa Comunidade Autónoma, sostidos con fondos públicos, que imparten ensinanzas de formación profesional e nel participa alumnado de ciclos formativos relacionados coas modalidades de competición que voluntariamente queira participar.

A inscrición será realizada polo centro educativo, que poderá presentar unha persoa por modalidade de competición, coas excepcións de Xardinaría paisaxística e Mecatrónica, nas que participarán en parellas.

O número mínimo de centros educativos inscritos en cada competición será de catro, aínda que excepcionalmente poderá autorizarse un número menor. En calquera dos casos, o número de competidores non será menor de catro.

O centro educativo determinará o sistema de selección dos seus competidores. A persoa



competidora levará consigo o seu DNI durante a competición, e acudirá na compañía dun/dunha profesor/a do centro, que actuará como persoa titora e que se encargará da súa preparación para a competición.

As competicións, na presente edición, están dirixidas preferentemente ao alumnado que estea matriculado en 1º curso nos diferentes ciclos formativos de grao básico, grao medio ou grao superior.

Artigo 5. Persoas competidoras

Para poder participar en *GaliciaSkills*, as persoas competidoras deberán cumprir os seguintes requisitos:

- Estar matriculadas en, ou ter finalizado recentemente, algunha ensinanza de FP sostida con fondos públicos na Comunidade Autónoma de Galicia.
- Ter un máximo de 21 anos cumpridos a 31 de decembro de 2023, excepto na competición de Mecatrónica, na que poderán ter un máximo de 24 anos cumpridos nesa mesma data.
- Non ter participado anteriormente nalguna edición de *SpainSkills*.

Coa súa participación, as persoas competidoras asumen as seguintes obrigas:

- No caso de obter a medalla de ouro neste campionato, participar en *SpainSkills 2024* e, no seu caso, nos campionatos *EuroSkills* e *WorldSkills*.
- Autorizar o tratamento de datos e imaxe para a difusión de *GaliciaSkills 2023*.

Artigo 6. Profesorado titor

O centro educativo designará un/unha docente, preferiblemente de entre o profesorado da persoa competidora, que se encargará da súa preparación. A persoa titora acompañará ao alumnado participante durante a competición, garantirá o cumprimento das obrigas e servirá de apoio e de axuda en caso de conflito ou urxencia.

No caso de que a persoa competidora obteña medalla de ouro, comprometerase a continuar coa súa preparación para *SpainSkills* e, no seu caso, para os campionatos internacionais *EuroSkills* e *WorldSkills*.

No caso de ser requirido, a petición do experto da competición, poderá formar parte do xurado da súa modalidade de competición. Así mesmo, poderá participar na elaboración da descrición técnica e do plan de probas.

Artigo 7. Profesorado experto

Por cada modalidade de competición designarase un/ha docente en calidade de persoa experta a proposta do Servizo de Relación co Sistema Produtivo, Orientación e Inserción Laboral.

O profesorado experto será o encargado de elaborar a documentación técnica da respectiva modalidade de competición e disporá todo o necesario para o correcto desenvolvemento da mesma. Esta documentación estará baseada nas descricións técnicas das modalidades de competición do último campionato nacional.

Así mesmo, manterá os contactos necesarios coas empresas do sector correspondente para conseguir patrocinios para a súa modalidade de competición.



Artigo 8. Xurado

Para a avaliación das probas realizadas polos competidores constituirase un xurado por cada modalidade de competición. O xurado será o responsable da cualificación das probas.

O xurado que estará composto por:

- A persoa experta da modalidade de competición, que ostentará a presidencia do xurado.
- Profesorado titor do alumnado participante.
- Representantes das empresas patrocinadoras ou expertos do sector correspondente.

Os xurados constituiranse nos días previos ao comezo da competición e o presidente do xurado levantará acta da constitución do mesmo e o comunicará á organización da competición.

O xurado deberá estar familiarizado con todos os detalles das Normas de competición *GaliciaSkills 2023*, e coa documentación técnica da súa modalidade de competición (descricións técnicas, criterios de avaliación, plan de probas e lista de infraestruturas).

As decisións dos xurados serán inapelables.

Artigo 9. Presentación de solicitudes

O prazo de inscrición en *GaliciaSkills 2023* permanecerá aberto ata o 15 de maio de 2023.

Os centros educativos realizará a inscrición mediante o formulario web habilitado para o efecto en www.edu.xunta.gal/fp.

Artigo 10. Premios

Haberá dous premios por modalidade de competición que corresponderán ás persoas competidoras ou equipos que obteñan as dúas mellores puntuacións nas probas realizadas.

Os premios consistirán nunha medalla de ouro e outra de prata, sendo a persoa gañadora da medalla de ouro quen represente a Galicia nos campionatos nacionais de Formación Profesional, *SpainSkills 2024*. A persoa gañadora da medalla de prata será suplente da devandita representante e así sucesivamente. A asignación destas medallas darase a coñecer no acto de entrega de medallas e clausura de campionato.

Todas as persoas participantes recibirán un diploma acreditativo da súa participación.

Artigo 11. Certificacións

A persoas titoras e expertas en *GaliciaSkills 2023* recibirán unha certificación de actividade de innovación educativa cunha equivalencia de 30 horas de formación permanente do profesorado. Ademais, no caso de que a persoa titora prepare ao alumnado para *SpainSkills 2024* recibirá outra certificación equivalente no curso 2023/2024.

Artigo 11. Dotación orzamentaria

O financiamento dos gastos ocasionados polo desenvolvemento deste campionato procederá dos créditos transferidos polo *Ministerio de Educación y Formación Profesional* á Comunidade Autónoma de Galicia, a través do reparto de crédito do *Acuerdo de la Comisión General de Educación, de 21 de julio de 2022* dentro do Programa de Cooperación Territorial de Calidade en



Formación Profesional do Sistema Educativo Español. Polo tanto, esta actuación será financiada polo Ministerio de Educación e Formación Profesional, sendo susceptible de cofinanciación polo Fondo Social Europeo Plus (FSE+), no Marco Financeiro Plurianual 2021-2027.

Artigo 12. Datos de carácter persoal

Os datos persoais recadados neste procedemento serán tratados na súa condición de responsable pola Xunta de Galicia - Consellería de Cultura, Educación, Formación Profesional e Universidades coas finalidades de levar a cabo a tramitación administrativa que se derive da xestión deste procedemento e a actualización da información e contidos do seu expediente persoal.

Co fin de darlle a publicidade esixida ao procedemento, os datos identificativos das persoas interesadas serán publicados conforme o descrito na presente norma reguladora a través dos distintos medios de comunicación institucionais de que dispón a Xunta de Galicia como son os diarios oficiais, páxinas web e os taboleiros de anuncios.

As persoas interesadas poderán acceder, rectificar e suprimir os seus datos, así como exercer outros dereitos ou retirar o seu consentimento, a través da sede electrónica da Xunta de Galicia ou presencialmente nos lugares e rexistros establecidos na normativa reguladora do procedemento administrativo común, segundo se explícita na información adicional recollida en <https://www.xunta.gal/proteccion-datos-persoais>.

No caso de existir diferentes referencias normativas en materia de protección de datos persoais neste procedemento, prevalecerán en todo caso aquelas relativas ao Regulamento (UE) 2016/679, Xeral de Protección de Datos.

Santiago de Compostela, na data de sinatura dixital

M^a Eugenia Pérez Fernández

Directora Xeral de Formación Profesional

